

0.0.1 vāseṭṭhasuttam

1. evaṃ mesutaṃ: ekaṃ samayaṃ bhagavā icchānaṅgale viharati icchānaṅgalavanasaṇḍe. tena kho pana samayena sambahulā abhiññātā abhiññātā brāhmaṇamahāsālā icchānaṅgale paṭivasanti. seyyathīdaṃ: caṅkī brāhmaṇo, tārukko brāhmaṇo, pokkharasāti brāhmaṇo, jānussoṇi brāhmaṇo, todeyyo brāhmaṇo, añño ca abhiññātā abhiññātā brāhmaṇamahāsālā.

2. atha kho vāseṭṭhabhāradvājānaṃ māṇavaṇaṃ jaṅghāvihāraṃ anucaṅkamamānānaṃ anuvicaramānānaṃ¹ ayamantarā kathā udapādi: 'kathambho brāhmaṇo hoti'ti. bhāradvājo māṇavo evamāha: yato kho bho ubhato sujāto hoti mātito ca pitito ca, saṃsuddhagahaṇiko yāva sattamā pitāmahayugā akkhitto anupakutṭho jātivādena. ettāvatā kho bho, brāhmaṇo hoti'ti. vāseṭṭho māṇavo evamāha: 'yato kho bho, sīlavā ca hoti vatasampanno² ca. ettāvatā kho bho, brāhmaṇo hoti'ti. neva kho asakkhī bhāradvājo māṇavo vāseṭṭhaṃ māṇavaṃ saññāpetuṃ. na pana asakkhī vāseṭṭho māṇavo bhāradvājaṃ māṇavaṃ saññāpetuṃ.

3. atha kho vāseṭṭho māṇavo bhāradvājaṃ māṇavaṃ āmantesi: 'ayaṃ kho bho bhāradvāja, samaṇo gotamo sakyaputto sakyakulā pabbajito icchānaṅgale viharati icchānaṅgalavanasaṇḍe. taṃ kho pana bhagavantaṃ

¹ anucaṅkamantānaṃ anuvicarantānaṃ - machasaṃ, syā.

² vattasampanno - machasaṃ, simu, syā.

gotamaṃ evaṃ kalyāṇo kittisaddo abbhuggato: itipi so bhagavā arahaṃ sammāsambuddho vijjācaraṇasampanno sugato lokavidū anuttaro purisadammasārathī satthā devamanussānaṃ buddho bhagavā'ti. āyāma bho bhāradvāja, yena samaṇo gotamo tenupasaṅka-missāma. upasaṅkamitvā samaṇaṃ gotamaṃ etamatthaṃ pucchissāma. yathā no samaṇo gotamo byākā-rissati. tathā naṃ dhāressāmā'ti. evambhoti kho bhāradvājo māṇavo vāseṭṭhassa māṇavassa paccassosi.

4. atha kho vāseṭṭha, bhāradvājā māṇavā yena bhagavā tenupasaṅkamimṣu. upasaṅkamitvā bhagavatā saddhiṃ sammodimṣu, sammodanīyaṃ kathaṃ sārāṇiyaṃ vītisāretvā ekamantaṃ nisīdimṣu. ekamantaṃ nisinno kho vāseṭṭho māṇavo bhagavantaṃ gāthāhi aj-jhabhāsi:

anuññātapatiññātā,
tevijjā mayamassu bho;
ahaṃ pokkharasātissa,
tārukkhassāyaṃ māṇavo.

tevijjānaṃ yadakkhātā,
tattha kevalino'smase;
padakasmā veyyākaraṇā³,
jappe ācariyasādisā.

tesaṃ no jātivādasmiṃ,
vivādo atthi gotama;

³no byākaraṇā - sīmu

jātiyā brāhmaṇo hoti,
bhāradvajo iti bhāsati;
ahañca kammanā brūmi,
evaṃ jānāhi cakkhuma.

te na sakkoma ñāpetuṃ,
aññamaññaṃ mayam ubho;
bhagavantam puṭṭumāgama⁴,
sambuddham iti vissutaṃ.

candaṃ yathā khayātitaṃ,
pecca pañjalikā janā;
candamānā namassanti,
evaṃ lokasmiṃ gotamaṃ;
cakkhuṃ loke samuppannaṃ,
mayam pucchāma gotamaṃ.

jātiyā brāhmaṇo hoti,
udāhu bhavati kammanā;
ajānataṃ no pabrūhi,
yathā jānemu brāhmaṇanti.

tesaṃ vohaṃ vyācikkhissaṃ⁵ (vāseṭṭhāti bha-
gavā),
anupubbaṃ yathātathaṃ;
jātivibhaṅgaṃ pāṇānaṃ,
aññamañña hi jātiyo.

⁴puṭṭhumāgamā - machasaṃ; puṭṭhum āgamma - syā

⁵vo ahaṃ byakkhissaṃ - machasaṃ

tiṇarukkhepi jānātha,
 na cāpi paṭijānare;
 liṅgaṃ jātimaṃ tesam,
 aññamaññā hi jātiyo.

tato kīṭe paṭaṅge ca,
 yāva kunthakipillike;
 liṅgaṃ jātimaṃ tesam,
 aññamaññā hi jātiyo.

catuppadepi jānātha,
 khuddake ca mahallake;
 liṅgaṃ jātimaṃ tesam,
 aññamaññā hi jātiyo.

pādūdarepi jānātha,
 urage dīghapiṭṭhike⁶;
 liṅgaṃ jātimaṃ tesam,
 aññamaññā hi jātiyo.

tato macchepepi jānātha,
 uduke vārigocare;
 liṅgaṃ jātimaṃ tesam,
 aññamaññā hi jātiyo.

tato pakkhīpepi jānātha,
 pattayāne vihaṅgame;
 liṅgaṃ jātimaṃ tesam,
 aññamaññā hi jātiyo.

⁶dighapiṭṭhake - sīma.

yathā etāsu jātīsu,
 līṅgaṃ jātimayaṃ puthu;
 evaṃ natthi manussesu,
 līṅgaṃ jātamayaṃ puthu.

na kesehi na sīsehi,
 na kaṇṇehi na akkhīhi;
 na mukhena na nāsāya,
 na oṭṭhehi bhamuhi vā.

na gīvāya na aṃsehi,
 na udarena na piṭṭiyā;
 na soṇiyā na urasā,
 na sambādhena methune.

na hatthehi na pādehi,
 nāṅgulīhi nakhehi vā;
 na jaṅghāhi na ūruhi,
 na vaṇṇena sarena vā;
 līṅgaṃ jātimayaṃ neva,
 yathā aññāsu jātīsu.

paccattaṃ ca sarīresu,
 manussesvetam na vijjati;
 vokāraṇca manussesu,
 samaññāya pavuccati.

yo hi koci manussesu,
 gorakkhaṃ upajīvati;
 evaṃ vāsetṭha jānāhi,

kassako so na brāhmaṇo.

yo hi koci manussesu,
 puthusippena jīvati;
 evaṃ vāsetṭha jānāhi,
 sippiko so na brāhmaṇo.

yo hi koci manussesu,
 vohāraṃ upajīvati;
 evaṃ vāsetṭha jānāhi,
 vāṇijo so na brāhmaṇo.

yo hi koci manussesu,
 parapessena jīvati;
 evaṃ vāsetṭha jānāhi
 pessiko so na brāhmaṇo.

yo hi koci munussesu,
 adinnaṃ upajīvati;
 evaṃ vāsetṭha jānāhi,
 coro eso na brāhmaṇo.

yo hi koci manussesu,
 issatthaṃ upajīvati;
 evaṃ vāsetṭha jānāhi,
 yodhājivo na brāhmaṇo.

yo hi koci manussesu,
 porohiccena jīvati;
 evaṃ vāsetṭha jānāhi,

yājako so na brāhmaṇo.

yo hi koci manussesu,
gāmaṃ raṭṭhañca bhuñjati;
evaṃ vāseṭṭha jānāhi,
rājā eso na brāhmaṇo.

na cāhaṃ brāhmaṇaṃ brūmi,
yonijaṃ mattisambhavaṃ;
bhovādi nāma so hoti,
sace hoti sakiñcano;
akiñcanaṃ anādānaṃ,
tamahaṃ brūmi brāhmaṇaṃ.

sabbasaññojanaṃ chetvā,
yo ve na paritassati;
saṅgātigaṃ visaññuttaṃ,
tamahaṃ brūmi brāhmaṇaṃ.

chetvā nandiṃ varattañca,
sandānaṃ sahanukkamaṃ;
ukkhittapaḷighaṃ buddhaṃ,
tamahaṃ brūmi brāhmaṇaṃ.

akkosaṃ vadhabandhañca,
aduṭṭho yo titikkhati;
khantibalaṃ balānikaṃ,
tamahaṃ brūmi brāhmaṇaṃ.

akkodhanaṃ vatavantam,

sīlavantaṃ anussadaṃ;
dantaṃ antimasārīraṃ,
tamaḥaṃ brūmi brāhmaṇaṃ.

vāri pokkharapatteva,
āraggeriva sāsapo;
yo na lippati⁷ kāmesu,
tamaḥaṃ brūmi brāhmaṇaṃ.

yo dukkhassa pajānāti,
idheva khayamattano;
pannabhāraṃ viṣaṃyuttaṃ,
tamaḥaṃ brūmi brāhmaṇaṃ.

gambhīrapaññaṃ medhāviṃ,
maggāmaggassa kovidaṃ;
uttamatthamanuppattaṃ,
tamaḥaṃ brūmi brāhmaṇaṃ.

asaṃsaṭṭhaṃ gahaṭṭhehi,
anāgārehi cubhayaṃ;
anokasāriṃ appicchaṃ,
tamaḥaṃ brūmi brāhmaṇaṃ.

nidhāya daṇḍanaṃ bhūtesu,
tasesu thāvaresu ca;
yo na hanti na ghāteti,
tamaḥaṃ brūmi brāhmaṇaṃ.

⁷limpati - sīmu, machasaṃ, syā

aviruddhaṃ viruddhesu,
attadaṇḍesu nibbutaṃ;
sādānesu anādānaṃ,
tamahaṃ brūmi brāhmaṇaṃ.

yassa rāgo ca doso ca,
māno makkho ca ohito;
sāsaporiva āraggā,
tamahaṃ brūmi brāhmaṇaṃ.

akakkasaṃ viññapaniṃ⁸,
giraṃ saccaṃ udīraye;
yāya nābhisaje⁹ kiñci,
tamahaṃ brūmi brāhmaṇaṃ.

yo ca dīghaṃ ca rassaṃ vā,
aṇuṃ thūlaṃ subhāsubhaṃ;
loke adinnaṃ nādiyati¹⁰,
tamahaṃ brūmi brāhmaṇaṃ.

āsā yassa na vijjanti,
asmim loke paramhi ca;
nirāsayam¹¹ viṣaṃyuttam,
tamaham brūmi brāhmanam.

yassālayā navijjanti,

⁸viññāpaniṃ - sīmu, machasaṃ, syā

⁹nābhisajje - machasam, syā

¹⁰nādeti - machasaṃ, syā

¹¹nirāsāsaṃ - machasaṃ, syā

aññāya akathaṅkathī¹²;
 amatogadham anuppattam,
 tamaham brūmi brāhmaṇam.

yodha puññañca pāpañca,
 ubhosangam upaccagā;
 asokam virajam suddham,
 tamaham brūmi brāhmaṇam.

candaṃva vimalam suddham,
 vipprasannamanāvilam;
 nandibhavaparikkhīṇam,
 tamaham brūmi brāhmaṇam.

yo imam palipatham duggam,
 saṃsāram mohamaccagā;
 tiṇṇo pāragato jhāyī,
 anejo akathaṅkathī;
 anupādāya nibbuto,
 tamaham brūmi brāhmaṇam.

yodha kāme pahatvāna,
 anāgāro paribbaje;
 kāmabhavaparikkhīṇam,
 tamaham brūmi brāhmaṇam.

yodha taṇham pahatvāna,
 anāgāro paribbaje;
 taṇhā bhavaparikkhīṇam,

¹²akataṅkathī - simu.

tamaḥaṃ brūmi brāhmaṇaṃ.

hitvā mānusakaṃ yogaṃ,
dibbaṃ yogaṃ upaccagā;
sabbayogavisamṃyuttaṃ,
tamaḥaṃ brūmi brāhmaṇaṃ.

hitvā ratiñca aratiṃ,
sītībhūtaṃ nirūpadhiṃ;
sabbālokābhibhūṃ vīraṃ,
tamaḥaṃ brūmi brāhmaṇaṃ.

cutiṃ yo vedi sattānaṃ,
upapattiñca sabbaso;
asattaṃ sugataṃ buddhaṃ,
tamaḥaṃ brūmi brāhmaṇaṃ.

yassa gatiṃ na jānanti,
devā gandhabbamānusa;
khīṇāsavaṃ arahantaṃ,
tamaḥaṃ brūmi brāhmaṇaṃ.

yassa pure ca pacchā ca,
majjhe ca natthi kiñcanaṃ;
akiñcanaṃ anādānaṃ,
tamaḥaṃ brūmi brāhmaṇaṃ.

usabhaṃ pavaraṃ vīraṃ,
mahesiṃ vijitāvināṃ;
anejaṃ nahātakaṃ buddhaṃ,

tamaḥaṃ brūmi brāhmaṇaṃ.

pubbenivāsaṃ yo vedi,
saggāpāyañca passati;
atho jātikkhayaṃ patto,
tamaḥaṃ brūmi brāhmaṇaṃ.

samaññā'hesā lokasmiṃ,
nāmagottaṃ pakappitaṃ;
samucca¹³ samudāgataṃ,
tattha tattha pakappitaṃ.

dīgharattamanusayitaṃ,
diṭṭhigatamajānataṃ;
ajānantā¹⁴ no pabruvanti¹⁵,
jātiyā hoti brāhmaṇo.

na jaccā brāhmaṇo¹⁶ hoti,
na jaccā hoti abrāhmaṇo¹⁷;
kammanā brāhmaṇo¹⁸ hoti,
kammanā hoti abrāhmaṇo

kassako kammanā hoti,
sippiko hoti kammanā;
vāṇijo kammanā hoti,

¹³sammuccā - sīmu.

¹⁴jānantā - sīmu.

¹⁵pabrunti - machasaṃ

¹⁶vasalo - syā

¹⁷pabrunti - machasaṃ

¹⁸vasalo - syā

pessiko hoti kammanā.

coropi kammanā hoti,
yodhājīvopi kammanā;
yājako kammanā hoti,
rājāpi hoti kammanā.

evametaṃ yathābhūtaṃ,
kammaṃ passanti paṇḍitā;
paṭiccasamuppādadasā,
kammavipākakovidā.

kammanā vattati loko,
kammanā vattati pajā;
kammanibandhanā sattā,
rathassāṇīva yāyato.

tapena brahmacariyena,
saṃyamena damena ca;
etena brāhmaṇo hoti,
etaṃ brāhmaṇamuttamaṃ.

tīhi vijjāhi sampanno,
santo khīṇapunabbhavo;
evaṃ vāseṭṭha jānāhi,
brahmā sakko vijānatanti.

5. evaṃ vutte vāseṭṭhabhāradvājā māṇavā bhagavan-
taṃ etadavocum: abhikkantaṃ bho gotama, abhik-
kantaṃ bho gotama, seyyathāpi bho gotama, nikkuj-

jitaṃ vā ukkujjeyya, paṭicchannaṃ vā vivareyya, mūl-
 hassa vā maggaṃ ācikkheyya, andhakāre vā telapajjo-
 taṃ dhāreyya, cakkhumanto rūpāni dakkhintī'ti. eva-
 mevaṃ bhotā gotamena anekapariyāyena dhammo pa-
 kāsito, ete mayaṃ bhavaṃtaṃ gotamaṃ saraṇaṃ gac-
 chāma, dhammaṃca bhikkhusaṅghaṃca. upāsake no
 bhavaṃ gotamo dhāretu ajjatagge pāṇupetaṃ sara-
 ṇaṃ gateti.